

Daankwoord utreiking Rink van der Veldepries op 14 juli 2021

Achte jury, wethoolder, vrouwluden en manluden,

Wat spietig trouwens dat Vrouw Van der Velde d'r vandedmiddag niet bi'j wezen kan...

Ik gao even mit jim weeromme in de tied. In 2016 was ik nommeneerd veur de Rink van der Veldepries veur mien roman Een vrouw van ivoor. Ik zie de vuuf nommeneerde schrievers nog naost mekeer zitten. Et was op 17 feberwaori en van links naor rechts zatten broederlik en grif toch ok wel wat gespannen op een riegeltien: Mindert Wijnstra, Johan Veenstra, Hylke Tromp, Willem Schoorstra en Anne Feddema. De man an de linkerkaant is d'r now al niet meer. Mindert Wijnstra raekte vleden jaor weg en hi'j is mar 74 jaor wodden...

De man an de rechterkaant, Anne Feddema, wun doe de pries veur zien boek De triennen fan Cheetah. Op et mement dat de juryveurzitter zee dat hi'j wunnen hadde, sprong Anne Feddema mit een stokmennig wilde galpen van de stoel. Wat een bliedschop! Ik zag et gebeuren, verwonderde me, en docht: zo zol ik nooit reageren. Ik daenke ok niet dat jim ok mar ien mement docht hebben dat ik zoks hier vandedmiddag in De Lawei ok doen zol.

Ik hebbe nooit de illusie had da'k disse pries ooit kriegen zol. D'r bin ommes zovule goeie Friese schrievers en d'r kommen vule meer Friestaelige boeken uut as Stellingwarfstaelige boeken. Dat ja, vule kaans gaf ik mezels nooit. En toch... is et wel gebeurd. Hier stao ik! Mit de neudige vertraoging deur die aekelike corona...

Doe 'k op 18 september 2021 weerommekwam van een midweke vekaansie mit kammeraod Jelle in Groet, heurde 'k op 'e voicemail de stemme van Ynskje Hoekstra mit de vraoge as ik heur bellen wol. De naeme zee me niks, mar ik hebbe votdaolik wel beld. En Ynskje bleek dus van de gemiente Smallingerlaand te wezen en zi'j vertelde me da'k de Rink van der Veldepries 2020 wunnen hadde veur mien roman Vroeger is veurgoed veurbi'j. Ik hebbe ok doe gien malle galpen slaekt, mar ik reageerde wel slim uitgelaoten en bliede. Et was ommes onveurstelber! Zo vuulde dat!

Ik hadde weliswaor nooit docht dat zoks me ooit overkommen zol, mar ik hadde et altied wel hiel graeg wild. Niet allienig omda'k best wel gek op priesen bin, mar veural ok om de naemgever van disse pies: Rink van der Velde. In mien boeekaaste staon alle boeken van Rink op volgodder van uitkommen. Een riek bezit! Rink van der Velde was zonder meer een veurbeeld veur mi'j en mien schrieveri'je en dan veural wat de kotte verhaelen anbelangt. Ik bin him schatplichtig!

Twie keer hewwe ooit tegere een literaire aovend verzorgd. De iene keer in Berkoop, in de grote zael van et spul daor Appie Tjalma vroeger in zat. We

wodden doe interviewd deur Pieter Jonker. En twiedens in de biebeltheek van Oosterwoolde.

Butendat komt Rink van der Velde de ere toe dat et neffens mi'j zien idee was dat de Stellingwarvers mit heur boeken ok op 'e ofslutende Boekemark in Drachten staon mossen, an et aende van de Friese sutelaktie. Jaorenlaank bin Fettje en ik daor persent west. Eerlik waar: et was iedere keer weer veur oons allebeide ien van de mooiste daegen van et jaor. Wat is et toch iewig spietig dat dat verleuren gaon is. Ik zie et allemaole nog zo veur me. Rink die op een stokmennig bierkratties zat en an de lopende baand zien boeken signeerde. Mit de

verkope wodde hi'j hulpen deur zien vrouw en zien zuster. Fettje en ik stonnen al die jaoren pal aachter heur.

We geneuten volop van de sfeer. De oranjekoeken van boekhaandel Brouwer, Henk Visser die mit de beerenburgflesse rondgong, de grauwe aten mit spek tussen de middag in et boverzaeltien van et Markkefé. En de drommen volk die boeken kochten en luusterden naor de mannen van Wiltsje fan Peazens. Prachtig! We geneuten! En zeker as die drie manluden van Wiltsje fan Peazens verstarking kregen van nog drie manluden. Drie betoefde schrievers en... zangers: Rink van der Velde, Trinus Riemersma en Klaas Bruinsma. En ze zongen... It lot fan Tea...

'k Wol it lot fan Tea besjonge, stoerder fisker wie der net

Hy ferlear as foege jonge oan 'e Sudersee syn hert.

De rillings gongen me d'r van over de rogge. Mar ja, vroeger is veurgoed veurbi'j... Of toch niet?

Et is van 't jaor twintig jaor leden dat Rink uut de tied raekte. Twintig jaor al weer. Zo gruwelik hadde gaot de tied. Zol et niet mooi wezen as d'r as ere an Rink van 't jaor nog ien keer zoe'n Boekemark op et Fraanse Pleintien hullen wodden zol? Ien foar 't ôfwennen... Ik bin d'r haost wel wisse van, wethoolder, dat de gemiente Smallingerlaand daor enthousiast an mitwarken zol. Fettje en ik zollen die dag mit et grootste genoegen nog es weer naor Drachten toe kommen. Et zol butendat een prachtig besluit van een veur mi'j slim biezunder jaor wodden.

Daank veur disse prachtpries, jury. Daank veur de ontvangst in Drachten, wethoolder. Daank dat jim hier vademiddag allegeer bi'j wezen wollen, vrouwluden en manluden. Veur jim staot een biezunder gelokkige Stellingwarver!